

D.^a VIRGINIA FRAGA DÍAZ, SECRETARIA XERAL DO CONCELLO DE TEO (A CORUÑA)

CERTIFICA:

Que a Alcaldía, con data de 12 de maio de 2020, ditou a seguinte **RESOLUCIÓN:**

RESOLUCIÓN DA ALCALDIA

ASUNTO: CONTINUACIÓN PROCEDIMENTO DE ADXUDICACIÓN DE PRAZAS NAS EIMs DO CONCELLO DE TEO

EXPEDIENTE: 2020/G003/000419

Considerando que, mediante o Real Decreto 463/2020, do 14 de marzo, declarouse o estado de alarma para a xestión da situación de crise sanitaria ocasionada polo COVID-19, estado de alarma que, segundo o Real Decreto 514/2020, do 8 de maio, atópase actualmente prorrogado ata as 00:00 horas do 24 de maio, nas mesmas condicións establecidas no Real Decreto 463/2020, e nas disposicións que o modifican, aplican e desenvolven, sen prexuízo do establecido nos artigos 3 e ss do RD 514/2020.

Considerando que, conforme aos apartados 1 e 2 da disposición adicional terceira do Real Decreto 463/2020, suspéndense os termos e interrómpanse os prazos para a tramitación dos procedementos de todas as entidades do sector público, reanudándose o cómputo dos prazos no momento en que perda vixencia o estado de alarma declarado no Real Decreto 463/2020 ou as prórrogas do mesmo.

Considerando que, pese á citada regra xeral de suspensión, hai que ter en conta as excepcións á mesma recollidas nos apartados 3 e 4 da citada disposición adicional.

Considerando que, de acordo co apartado 4 da disposición adicional terceira (na redacción dada polo RD 465/2020, do 24 de marzo), dende a entrada en vigor do RD 463/2020, as entidades do sector público poderán acordar motivadamente a

continuación daqueles procedementos administrativos que veñan referidos a situacións estreitamente vinculadas aos feitos xustificativos do estado de alarma, ou que sexan indispensables para a protección do interese xeral ou para o funcionamento básico dos servizos.

Considerando que, segundo o artigo 6 do RD 463/2020, do 14 de marzo, referido á xestión ordinaria dos servizos, cada Administración conservará as competencias que lle outorga a lexislación vixente na xestión ordinaria dos seus servizos para adoptar as medidas necesarias no marco das órdenes directas da autoridade competente aos efectos do estado de alarma e sen prexuízo do establecido nos artigos 4 e 5 do citado RD.

Visto o informe do concelleiro dos servizos de benestar, persoal e deportes, do 12 de maio de 2020, no que se pon de manifesto a necesidade de continuar co procedemento de adxudicación de prazas nas Escolas Infantís Municipais (en adiante, EIMs) do Concello de Teo.

Considerando que segundo o artigo 5 do Regulamento de organización e funcionamento das escolas infantís municipais do Concello de Teo (en adiante, Regulamento), o curso académico comeza o primeiro día lectivo do mes de setembro.

Con anterioridade ao comezo do curso académico debe realizarse todo o procedemento administrativo para a adxudicación de prazas, segundo o previsto nos artigos 6 e ss do Regulamento, procedemento que comeza coa solicitude de preinscrición cuxos prazos, segundo o artigo 8 do Regulamento, abarcan do 1 ao 15 de marzo, para a reserva de praza, e do 16 ao 31 de marzo, nos supostos de novo ingreso.

Considerando que, tratándose dos supostos de novo ingreso, dito período de preinscrición non se puido facer efectivo como consecuencia da declaración do estado de alarma e a suspensión dos prazos e termos administrativos derivada do mesmo.

Considerando que o proceso de preinscrición é imprescindible para a adxudicación das prazas das EIMs, xa que todo o sistema de valoración das solicitudes descansa na documentación presentada, resultando ademais que é o punto de partida para o procedemento de baremación, listado provisional, reclamacións, listado definitivo, e por ultimo a matricula dos alumnado para o seguinte curso.

Considerando que as familias que necesitan este recurso de conciliación, precisan saber, coa antelación suficiente, que poden contar con el xa que, de non ser así, veríanse obrigadas á busca doutras alternativas.

Así mesmo, debe terse en conta que para facer planificación do persoal e horarios das EIMs resulta imprescindible coñecer as *ratios* de usuarios en cada cadrante horario, dato este que so se coñece ao remate do proceso de matricula.

De acordo con todo o exposto resulta evidente que non resulta posible demorar máis a continuación do procedemento de adxudicacións das prazas nas EIMs, porque iso impediría realizar en tempo en forma as actuacións necesarias para o comezo do curso, polo que dita continuación resulta indispensable para a protección do interese xeral e para o funcionamento básico dos servizos.

Considerando que concorren razóns de interese público que fan necesaria a difusión do contido do presente da forma máis ampla posible.

Considerando que, tal e como se desprende da normativa citada, a continuación dos procedementos require que o órgano competente o acorde motivadamente, o que se cumprimenta a través do presente.

Considerando que, con motivo da crise sanitaria motivada polo COVID-9, con data de 16 de marzo de 2020 ditouse Decreto da Alcaldía (res. 265/2020) en virtude do cal resolveuse o peche total da atención presencial nas oficinas centrais do Rexistro Xeral, limitándose a unha atención telefónica e telemática.

Considerando que, á vista das medidas que se veñen adoptando de cara á nova normalidade, está previsto que a apertura das oficinas centrais do Rexistro Xeral do Concello teña lugar, previsiblemente e unha vez que se adopten todas as medidas de

seguridade necesarias para dar cumprimento ás esixencias derivadas da crise sanitaria e do estado de alarma, o vindeiro luns 18 de maio.

En virtude do exposto, e no uso das facultades que me confire o artigo 21.1 da Lei 7/1985, do 2 de abril, reguladora das bases do réxime local e demais normativa aplicable,

RESOLVO:

Primeiro.- Continuar o procedemento para a adxudicación das prazas nas escolas infantís municipais do Concello de Teo para o curso 2020/2021, de acordo cos artigos 5 e ss do Regulamento de organización e funcionamento das EIMs.

Segundo.- O prazo de inscrición nas EIMs do Concello de Teo para o curso 2020/2021 abarcará dende o día 13 de maio ata o 2 de xuño, podéndose presentar as correspondente solicitudes tanto no Rexistro Xeral do concello, neste caso a partir do luns 18 de maio, como na sede electrónica do mesmo.

Terceiro.- A presente resolución surtirá efectos dende o día da súa data, sen prexuízo de facer público o contido da mesma, para xeral coñecemento, no BOP, no taboleiro de edictos do Concello, na web municipal, no portal de transparencia e na sede electrónica.

Cuarto.- Contra a presente resolución, que pon fin a vía administrativa, poderanse interpor os recursos previstos no artigo 123 da Lei 39/2015, de 1 de outubro, do procedemento administrativo común das Administracións Públicas, recurso potestativo de reposición ou directamente recurso contencioso-administrativo, sen prexuízo de que, de acordo co disposto nas disposicións adicionais segunda e terceira do RD 463/2020, de 14 de marzo, queda en suspenso o prazo para a interposición, no seu caso, do recurso contencioso administrativo.

Quinto.- Dar conta ao Pleno na vindeira sesión ordinaria que se celebre.

E para que así conste, expido e asino a presente de orde e co visto e praxe do sr. alcalde, en Teo na data da sinatura dixital que figura na marxe.

Vº e Praxe

A secretaria xeral

O alcalde

Rafael C. Sisto Edreira

Virginia Fraga Díaz